

遂  
初  
堂  
詩  
集

遂初堂詩集卷之七

江嶺遊草

金山

長江西來一萬里雷轟箭激趨東瀛金山突起扼江路  
孤柱力與洪濤爭盤渦推盪崖壁轉沸浪跳蹙魚龍驚  
有時波平天一色芙蓉倒浸玻璃明樓臺參差冠巖扃  
風帆縹緲空中行月輪洗出桂樹淨鼉背湧起三山輕  
二十年前潤州道鐵鎖橫江防海島山面築城城戍兵  
鶴怨猿啼隔幽討只今窮髮不揚波六龍巡幸來經  
過詔撤重城露山面皎如寒帳看修蛾白玉闌干浸

空碧金輪寶刹光相射貝葉翻雲曉扣鐘羽衣坐月宵  
吹笛畱雲亭上片雲秋紫海丹山一望收尋常不敢題  
詩句 宸翰龍章在上頭

發儀真遇便風半日抵龍江關帆駛浪高兩岸山  
巒如畫

朝發真州城微風動蘆葦出江始峭帆箭激不可止驚  
浪如雷鳴低昂逐船尾轉盼及龍潭迴頭失揚子帆山  
拂水青鍾陵映天紫倒影入蓬窓層層錯如綺日旰到  
長干舟人一欣喜何意笑談間泝流百餘里江行無常  
程遲速不可擬便風良復佳牽挽亦恒理但當慎風波

涉險方此始

燕子磯

臨江峭壁不知數第一玲瓏燕子磯  
帖水懸巖長剪剪穿雲乳石乍飛飛  
香車斷續來絨闕梵刹高低出翠微  
截住洪流關地軸分明形勢鎖南畿

陵下

大江滔滔東下燕子磯緊鎖水口爲金

報恩寺

南朝四百八十寺剩有長千古刹雄  
拓地規模如大內憑高形勢盡江東  
塔非阿育應難造像恐優填刻未工  
誰似空王威力大吳宮晉苑劫灰中

朝天宮

飛觀崢嶸斗極邊，百官曾此習朝天。  
門依闔闔三階正，殿傲含元九室連。  
幾度御香焚玉女，到今清淚濕銅仙。  
齋房道士眉如雪，指點疑陵一惘然。

金陵詠古八首

金陵形勢真天造，絕勝洛都兼汴京。  
地盡南條收王氣，國依天塹作金城。  
轉輸近便休民力，屯牧優閑省衛兵。  
但得忠良守邊塞，垂裳端可致升平。

江東自昔多英俊，龍變雲蒸不自由。  
公瑾伯符何豁達，謝安王儉儘風流。  
三分事業帆留影，六代繁華水發漚。

欲向荒原弔陳迹暮蟬衰柳不勝愁

濠泗真人渡六龍艱難百戰掃羣雄江東橋撤滅強寇  
舊內門開表大功定鼎規模駕唐宋卜陵形勢擬岐豐  
如何灑涕新亭後不得西陽一餉紅

金川門事最傷情逐燕翻教上帝京自古書生工悞國  
誰令豎子浪談兵魂歸杜宇春猶泣碧化萋弘草不生  
殉難從亡紛野史可憐真僞半難明

留都官務最清閑早出尋花暮看山三事徊翔皆散地  
六曹坐爝總仙班笙歌泛月船長沸燈火留賓鑰不關  
歷歷升平行樂處華胥夢斷有無間

四家鐵騎驕堪戰相國丹心死不灰若使中朝無鬼蜮  
可能半壁便崩頽枕戈歲月唯荒涵巢幕心情尚怒猜  
火照淮南翻撤戍晉陽甲自上游來

朱雀烏衣一夕曛桑田碧海事紛紜中山府第爲官署  
大內宮牆宿禁軍艷艷火旗穿郭見嗚嗚霜角隔江聞  
鶯花三院今何在草綠長堤似舞裙

天闕牛頭對兩峰三茅天際紫煙重挂冠吾慕陶弘景  
築室將尋雷次宗塵俗喧卑難共語江山清曠儼相容  
勞勞亭畔頻回首送客船窓有暮鐘

牛渚

大波轟如山小波割如電奔騰巖巖間洶洶相攻戰帆  
勢掃千軍篙力爭一綫披圖想牛渚絕險今始見蛟鱷  
多奇形躍浪時隱見此輩水爲都何足窮謫誕浩浩紅  
塵中物怪有千萬射工善潛形黎丘習變眩安得太真  
犀一燃無遺盼

采石

采石磯臨大江浦姑熟當塗作門戶石勢盤迴一臥獅  
江流湍激千強弩開平虎將不可當挺戈一躍三丈強  
元軍風靡太平潰江東帝業從此昌時平事遠無踪跡  
釣艇衝烟樵路白老僧推戶看殘霞估客落帆捫絕壁



吳頭楚尾水連天，虎鬪龍爭事惘然。  
狂殺青山李太白，騎鯨捉月送流年。

天門山

瀟江挾萬流，直下飛電速。  
天意欲少畱，故遣雙峰束。  
削成肖天門，湧出橫地軸。  
獰如虎牙張，矯若龍鱗蹙。  
我行遠見之，瑰奇駭心目。  
維舟思暫遊，迨此暮景促。  
鼓勇一褰裳，上上西山麓。  
磴道屢盤迴，梯空出巖腹。  
崖危劣通人，壁窄不受屋。  
攀登及層巔，周覽罔巒複。  
驚濤上濺衣，崩雲下承足。  
恍如控奔鯨，戲就滄溟浴。  
海內多佳山，寧能徧遊矚。  
到眼不可孤，日入當秉燭。

蕪湖關

欵關何所有天地一輕舸津吏應相笑漁翁故自豪購

書填客篋載酒壓江濤

市上買書數種水陽酒百瓶

鄉夢從今遠看

雲首重搔

螺磯孫夫人廟

仲謀真虎子阿妹亦英流嫁與劉郎去能令魏武愁恩  
乖緣兩帝魄毅自千秋借使生兒在還如後主不

荻港

百丈緣蘆荻孤舟傍渚汀夜風豚拜浪曉雨暈藏星爲  
客知農候論都識地形赭折廻望好遮斷冶山青

大通釋

大通臨水市間道走蘇湖百貨魚鹽雜千家菱藕俱鄉園七舍近書札一行無歸夢誰相攬淡更警雁奴

經車家湖望銅陵青陽諸山蒼翠萬狀遂登陸遊

九華

江行足風湍愛此溪路永沿湖得澄湖渟泓一鏡靜空天碧無痕萬象森倒影靡靡葭菼澱落落鳧雁冷舉頭見遙青飛巖怒而騁尖圓各異狀雄秀隨所領九華高摩天一氣含芒穎削成九芙蓉照灼三霄頂吾本餐霞人失脚墮塵境對此如家山得歸萬緣屏登頓憑肩輿

超遙度煙嶺嗟爾市朝人何年夢初醒

雙峰菴

雲端雙石笋秀色落江心何處恰相對茅堂開竹林蟬  
聲催樹切虎跡印苔深欲訪蓮峰徑殘陽紫翠沈

神光巖禮地藏塔

度生弘願在曠劫渺難酬示現爲王子精勤作比丘心  
空大海度緣合此山留石爛跏趺跡林香蒼蔔秋地神  
供土飯龍母施靈湫枯槁爲清衆慈悲拯溺流功勳一  
期滿應化百年周真相留巖際神光出嶺頭飯依窮震  
旦頂禮遍神州法界靈官護金錢御府收一乘真寶筏

三界本虛舟會得無生理幽冥何所求

化城寺

盡道靈山地藏開不知杯渡已先來琳宮直占蓮花葯

香沼如安明鏡臺聖押金經原肉賜明慈聖太后賜塵

封隻履未西回大士遺履一杖長二尺許僧房簇似蜂房啓留客家

家掃碧苔

龍菴

香刹遙看一抹青籃輿轉向此中停炎蒸不上三層閣

紫翠全收九疊屏屋後新泉龍女供夜分清梵雁王聽

苾芻好事能攜杖徧剔蒼苔讀舊銘

宴坐巖

大士潛修地雙趺尚宛然巖空眠似屋壁削望如船巖  
合疑無地江翻覺有天由來參觀者相見別峰巔

伏虎洞

徑險從猿挂崖危舊虎巢半龕留客夢一飯試山肴石  
勢翻風旆峰稜疊卦爻應知習定者不受一塵滯

登天臺絕頂

九十九峰何重重就中第一天臺峰遊人千百無一到  
往往氛霧迷樵蹤我來恍惚有神助迅風掃出青芙蓉  
徑上層岡度陰壑風日凄凜如霜冬羣山漸漸覺低伏

長安宮集 卷之二  
衆石一一呈玲瓏如屏如笏千萬態造物所幻難形容  
飛橋橫空最奇絕側足萬仞臨奔淙靈草輪囷九節杖  
壽藤蟠絡千年松登登絕頂何所見千巖萬壑來朝宗  
九子伏如馬仙姑覆如鐘惟有黃山三十六峰相拱揖  
磅礴一氣分橫縱舉手摘牛斗俯身跨虬龍西眺江楚  
東吳淞廬霍八九吞心胸乃知茲山撐天拄地自雄絕  
何必虞帝望祀秦皇封

活埋菴贈默安禪老

九子山頭第一峰掩關枯坐有南宗  
銜花罷供心離境撥草無人路絕蹤  
脚下雲生長似絮膝邊松偃欲成龍

挂瓢只合相依住掃雪敲冰過幾冬

下天臺自龍口出山迺驟雨山徑險仄不容肩輿  
跣足行巖澗中二十餘里却視諸山在雲海中隱  
見出沒備諸奇詭賦詩誌快

天臺路氤氳其下常晴霽朝來僧牕中縷縷雲出砌謂  
此無妨行出山志頗銳如何轉前坡雷雨竟狂厲却回  
旣艱難逡巡亦非計行行屏肩輿赤脚下天際緣崖杖  
孤撐遵澗裳屢揭沾濕何足辭所愛烟景麗峰尖迤隱  
顯雲氣乍開閉或閃波中帆或露牆外髻衆壑瀉奔淙  
瞥電無停勢逶迤歷山村取酒時一憩須臾斜陽明漸



次豁蒙翳千峰儼新沐晞髮遙相睇綠玉切無垠芙蓉  
露其蒂平生嗜登覽茲遊諒難儷歷險境乃奇閱變心  
始契思我同懷人強半班行綴此樂誰得知放浪天所  
惠

樅陽

梅根纔過眼繫纜復樅陽遠愛地名古不知江路長杯  
青山近岸夢白月臨牀鬱鬱旌旗色南巡想漢皇

李陽河阻風

久泊船依碇高眠浪擁沙無風增苦熱有月引思家生  
事泥中絮行藏海上槎順帆多快意小住莫長嗟

皖江遇都平倩侍御

江行經月無相識，皖口今朝見故人。  
並舍京華仍契濶，連檣水驛轉情親。  
世途久已輕儒素，關吏何曾恕要津。  
侍御頗爲推關所苦任昉諸孤良可念，脫驂殊愧孝標貧。  
謂周計百大計

登安慶迎江寺塔

江似長蛇走東海，舒州形勢握中央。  
山頭黑土新軍壘，郭外黃茅古戰場。  
一水穿沙來皖口，千峰疊翠拱池陽。  
居人寥落無相識，獨挈殘僧話上方。

余忠宣祠

艱危百戰守孤城赤手難扶白日傾力盡妻兒同抗節  
義高裨校不偷生與朝褒禮還祠廟異代遊魂尚旆旌  
慚殺白頭危學士謫官偏向塚邊行

磨盤洲

沙圍水遶一孤洲云是江南地盡頭不信今宵方作客  
聽猿對月向來愁

馬當山

飛帆如箭劈流開遙奠江神酒一杯好風肯與王郎便  
世上惟君不妬才

小孤山

落日銜丹閣驚湍滾碧岑鷓棲巖竇矯龍竄渾淥設  
險神明意迴瀾天地心禹功疏鑿後嶷削到如今

石鐘山

沿江山連連氣象但雄潤湖口見石鐘軒然特奇拔雙  
峰似奔猊下飲湖波渴不知幾千載水石相滂汨嵌空  
山懸根透瘦石露骨側立肖斧皴中開象門閤亭亭吐  
花跼蠹蠹排箭筈翩若垂旌旛屹如具袍笏樓閣綴飛  
巖流盼窮天末彭蠡靜如杯匡廬青可掇征帆逐天風  
巖關不可越卽境成滄留會心得超忽水石有奇音鏗  
鐃時一發欲驗坡公言歸舟候崖月

大孤山

名山不在大寸碧截中流勢蹴龍蛇轉根連牛斗浮猿  
聲五老暮塔影九江秋聖女留祠廟青楓萬古愁

鄱陽湖

鄱陽疑少海南紀衆流歸漲蓄三江截沙明六郡圍鏡  
光涵象遠黛色帖天微快絕鴻濛裏風帆一箭飛

望廬山

夢想匡廬道推蓬今宛然奇峰皆倒水高嶺不分天九  
疊開屏障三霄挂瀑泉爲游莫草草小憩可窮年

南康道中

湖上殘霞逗晚晴  
纖纖一塔隱高城  
船舫蒼濶琴書冷  
盡日廬山影裡行

吳城

水市明燈夜泊船  
祠神簫鼓鎮闌闌  
高檣重礎眠難穩  
風浪關心是長年

自安慶至南昌可六百里三日便到風利馭駛馬  
當鄱湖牛欄諸險俱於枕席上過作歌志喜

我從金陵溯江路一月甫到皖水陽  
夏多南風湖浪惡不知何時望南昌  
清朝幡竿忽前指舟子喜笑帆高張  
初猶舒徐漸決驟大波砰擊聲雷碾  
過眼千村樹滅沒

拂舷兩岸山低昂小孤大孤過如鳥鄱湖粘天飛一航  
南康風利不得泊吳城酒醒西山蒼計程六百三日到  
尚淹半日湖關傍三老咨嗟歎奇絕此實天意非人量  
我生百事苦遲鈍十步九蹶恒章皇志願蹉跎局牛軛  
宦途偃蹇行羊腸往往退飛隨六鷁年年巨閩同黃楊  
胡爲茲遊偏快意身無兩翼能騰驤宿世溪緣在山水  
多生結習餘文章登臨嘯咏天賜興減足增翅元相當  
更無多談快作達此樂殊勝南面王

滕王閣

高閣曾聞化劫灰何年重搆氣佳哉臨牕白日三天近

拂袖雄風七澤來江抱龍沙文練轉山衝雉堞畫屏開  
人間亦有樓居樂早喚羣仙絳闕回

碧海成田若木髡昔年臨眺幾人存有情會見江山老  
終古誰令日月奔勝地名垂鴻過影空江人到雪留痕  
三王詞賦猶磨滅帝子豪華何足論

鐵柱宮

洪都原積水城郭半龍湫不有仙靈出能無岸谷愁神  
符百怪竄飛鳥九天游萬古支祈鎖蒼蒼鐵柱留

遊西山翠巖寺

觸熱游西山興發不可緩從人笑其迂吾自策吾懶溯



游渡滄江登頓歷修坂落落村墅清回回林岫遠寺門  
淡松根巾車到來晚徑就繩牀眠旋烹露葵飯老僧嗣  
宗風標格頗蕭散相攜坐平橋四山青纂纂泉豐稻苗  
肥石瘦茗芽短崖月懸古光谿風扣虛窾是心芬陀華  
於何煩濯浣石磬本無聲一擊大千滿

同雪門和尚游洪井洞

雪公退院久足不踰團焦喜我撥草至松泉傾滿瓢靈  
洞有奇蹤導游不辭遙涉澗凌亂石梯巖攀飛條懸瀑  
從天來削壁垂藤橋一泓井無底下通章江湖傳聞古  
仙翁神丹於此燒至今北山頂月夜聞笙簫洪厓去已

久綵鸞不可招

寺前鸞岡是吳  
絲鸞升仙處

但愛境清冷一坐萬念

銷大地無垢淨物情有紛囂岸故逐舟移月乃隨波搖  
仙釋異閭闔定慧同根苗白石了無語還以問叅寥

### 豐城

山勢學龍蟠孤城枕積湍樹沈沙市暗星帶客帆寒文  
物茲邦古兵氛到處殘亂絲愁史局那得揭文安

揭曼  
碩豐

城人修宋  
遠金三丈

### 劍池

碧天爲劍色秋水作龍吟神物化已久幽人感至今山  
川多異氣廊廟少澁心不願充人佩何妨匣底沈

蕭公廟

豫章多水神蕭公產茲土壘然一村儒靈蹤粲可數端  
居拯覆舟拔濟風濤苦百歲跌坐終畱形在堂戶航海  
助星槎平苗張禁旅一一著神奇褒封垂天語至今官  
商船肅拜奠椒醕古樟數十株輪囷蹙龍虎託根依廟  
壖千年脫斤斧愛此地高涼棲遲過亭午山光玉笋新  
碑文宛陵古廟有旄思山碑銘甚雅馴欲續傳芭辭靈旗颯飛雨

峽江

峽江山對鎖不覺有江來船向羊腸出城臨虎穴開燒  
倉穿嶺急水碓撥雲回客鬢先秋白何煩一葉催

吉安

廬陵自古秀人文  
文筆織織上插雲  
高第如林多石表

孤忠蓋代有荒墳

文丞相墓在螺子山

運移乍徙蛟龍窟  
物索新

遭鴉鵲軍大業殘  
碑尋不見寒沙落  
盡淺溪紋

花石潭

一道清溪四面山  
桑麻雞犬晝閑閑  
武陵只在人間世

逢着桃花莫便還

十八灘

連山三百里夾岸鬱相對  
一江穿其中萬壑飛泉會  
落天勢崩騰迫此亂石礙  
斑斑碁縱橫落落星破碎  
連蜷

龍昂頭削劣鯨露背羣遊雁成行錯立鳧失隊或如八  
陣羅或若三門隘或銳如戈鋌或頑如礮礮覆釜在盤  
渦沈牛處潛味淺淡無定蹤小大各異態爲難百十重  
著名十八最舟行路縈紆一線穿巖斷長年莫自必稍  
縱輒敗壞造物宜坦夷胡存此硯礪得非示艱虞無乃  
存鑒戒茫茫人寰中對面阻關塞有形未爲險無迹斯  
可駭所願心地平廓然忘情界浩蕩乘虛舟逍遙八荒  
外

贛州

虎頭城下水周遭獵獵秋風動節旄  
屹地當五嶺隘

建瓴江落百灘高，闕嚴使客猶停旆。俗健居民亦佩刀，  
定變文成真得地。順流一夜縛宸濠。

南安道中

紅船重換板船輕，復渚迴洲次第行。香草每欣初辨種，  
好山長恨不知名。終朝帆影隨鴻影，永夜灘聲作雨聲。  
行盡輿圖三四幅，茫茫烟水尚南征。

大庾嶺

北雁愁聞到却回，游人何事溯灘來。峰頭雲起常疑瘴，  
驛路榕多不見梅。丞相鑿山孤廟在，禪師留鉢五宗開。  
嶺上有張曲江廟，及六祖放鉢石。蒼苔冷石婆娑久，數遍千般翠作堆。

南雄

又過梅關半日程，亂蟬哀角宿山城。  
池喧重理生衣著，夢冷猶循江岸行。  
亭卒能言桑海事，館人偏記禁林名。  
同官游嶺南者，店名端州。此去還千里，更上漁舟一葉輕。

始興江口

瀆水飛流下枝江，會始興戎樓。  
依露樹客舫，亂風燈鷗。  
泛初無着雲行安所憑，開元一賢相垂老畏青蠅。

涼風

嫋嫋涼風吹鬢絲，鄉園景物最堪思。  
曲江宰相風流甚，鈴索聲中賦荔支。

南華禮六祖真身

醫王不虛生審病乃發藥佛語流教宗名相紛纏縛大  
士垂悲憐乘願來濁惡現身不識宇心光洞寥廓婆娑  
老黃梅張網羅燕雀俊哉一神鷹寶珠當頭掠半夜奪  
虎符三軍皆錯愕歸來隱曹溪潛光守屈叟多口談風  
幡天龍識頭角崛起標法幢洪爐鼓橐籥盡掃筌蹄空  
朕迹不留着心宗炳朝光義學掩夜燭至今衆兒孫萬  
流稟一勺我來遊寶林璇房粲巖壑清溪駛潏潏香風  
浩漠漠中有不壞身跏趺儼如昨肅拜瞻慈容悲感淚  
潛落窮子久逋家金鏡未刮膜願垂圓鏡光彈指開樓



閣

韶州至清遠道中雜詩

我行泝江湖地盡吳楚域山水佳有餘未足誇奇特度  
嶺浮瀆江險怪乃莫測丹山信霞標白水真練纒懸巖  
龍垂胡歆壁鵬塞翻竹箭拔地圓旌幢摩天直得非神  
鞭驅無乃鬼斧刻媯皇立極時斷鼇蓄餘力作此詭譎  
觀用充樽鼎飾混沌死中央儵忽有德色

瀆陽峽百里兩崖狀如門江流日漱嶠崩剝露危根空  
中頤霽削骨立龍虎蹲孤舟出其下凜然悽心魂石戴  
萬篙眼壁縈千緯痕溯流行良難下峽如星奔灘激波

易駛林深景常昏奇峰逶迤送百千互卑尊或肖天榜  
挂或疑鐵騎屯心賞不暇接目眩難具論古來投荒人  
鬱結聲長吞壯觀有如此何必非君恩

中州山多眠嶺外山盡立或如跛而舞或如拱而揖絕  
笏擁森森劍佩排巖巖造物巧有餘變態不相襲前奇  
謂無雙後幻仍百十重華奏簫韶於茲百靈集石韻留  
鏗鏘湘娥夜淚泣三十六芙蓉賞玩不遑給徵名藉榜  
人驚湍如箭急

東坡愛茲江甘列世無比智藥掬飲之謂似西天水我  
非博物流但美清見底一碧涵空明萬象紛可指層峰

上干霄倒影見蒼紫何殊衆嬋娟  
霽眉明鏡裏涼風起  
蘋末扣舷思君子上流濯我纓  
下流洗我耳

往時翫英石奇巧詭天成如何一拳小而具巖洞形茲  
來見英山尺寸皆空靈有壁盡波皺無崖不雲橫峰爲  
垂手舞穴作通天明乃知茲邦產小大無殊情石爲山  
一瀝山爲石全瀝萬丈一巧石怪偉使天驚惜哉顛米  
老空向炎州行尚寶袖中石取笑於鷓鴣

觀音巖

懸巖百丈枕江斜鳥路誰開大士家  
委宛一螺山透穴  
玲瓏千乳石垂花  
燃燈人禮煙中磬  
乞米僧歸月下槎

去艇來帆如過鳥浮生流浪劇堪嗟

飛來寺

峽山古寺面江開鐘板蕭條過劫灰客爲江清貪久立  
殿因山好解飛來鶴歸長認南朝樹瀑下時驚五夜雷  
不用題名選巖壁前賢詩碣總莓苔

閱江樓

端州地扼東西粵形勢居然壯百蠻一峽東江寬似海  
三山帶郭拱如環天清霸氣消龍虎月冷燐光出草菅  
獨上高臺搔首百年成敗一枰間

冠山樓閣象層城飄落天風玉笛聲鐵榦爲牆榕樹老

銀鈞作字薛碑明

樓下有平鑿碑

地經苦戰空梁在客到浚秋

百感生安得如雲重締構庾公清嘯最多情

七星巖

中天之星尊北斗帝車盤旋握天紐因朝炎帝遊南溟  
遺精化作七蒼阜一星一峰拔地出若斷如連奇復偶  
萬山中央特青葱秀色常如新雨後排空一石骨峻嶒  
寸土纖泥都不受天梯鳥棧誰經營地肺神俞誰鑿剖  
就中石室最空靈玉乳金膏垂數畝石鼓響激雷雌雄  
石牀眠酣龍子母滿壑題名餽繡苔燭之不見捫觸手  
螺旋蝸轉忽透空軒豁雲牕與月窟焚香僧似鳥窠禪

對奕人如橋中叟玉屏一峰亦秀絕千尺蒼藤絡榕柳  
扶孺臺橫劈斧鉞銜珠徑仄當關守醉石欹斜石丈眠  
飛雲狎獵雲龍走其餘諸峰盡怪絕天柱嶙峋與天友  
琰杯隔水如側犀仙掌擎雲類駢拇蟾蜍峰高龍所都  
阿波巖溪怪之藪爭奇競巧各出意餘波猶皺峰八九  
瀝湖環浸涵空明春波溶溶碧於酒倒影浴出千芙蓉  
何如新粧臨鏡婦世上名山亦多有遠望玲瓏近粗醜  
此山片片琅玕膚內含潔白外蒼黝雕鏤作器佳無雙  
玉案雲屏世爭取天生靈質非頑材似與列仙爲苑囿  
蓬壺瀛洲不可到武夷天台能勝否便思掛笠巢雲松

未忍鐫詩割瓊玖

靈山寺

遙江趨峽怒古寺綴山明  
窓納千颿駛厨歸一澗清  
僧高無俗語客冷有閒情  
袖出端溪紫烹泉與細評

羚羊峽

萬里泮泐水迢迢赴峽門  
舟隨一葉下山帶薄雲昏  
羊掛霜無跡猿啼月有痕  
誰能爲逐客於此不銷魂

朝漢臺

秦火燒阿房劉項方龍戰  
五嶺隔中州英雄乃乘便  
一令起龍川虎嘯臨海甸  
北絕湟水關西阨壺頭嶽  
居然

王一方地利珠犀擅九宇沸如湯茲邦獨清真保障功  
亦高霸業未可賤奈何椎髻態習與文身變竊帝以自  
娛微哉井蛙見幸有陸大夫英風騁逸辨翻然去驕蹇  
臣漢甘北面能雄復能雌丈夫不恒健不見述與囂破  
亡速如電王國傳孫曾作計豈不善代遠廟貌頽誰爲  
蘋蘩薦獨此荒臺存綠蕪寒一片北去羨秦雲南巢羞  
越燕傳語後來人安危爭一問

光孝寺

越王有故宅後作虞翻園易寺名訶林壯麗聞中原揭  
來更兵火地入龍驤屯戒壇委榛莽馬通高墻垣殿廷



尚宏敞寮舍仍星繁米顛題佛名筆勢鸞鳳驚西天菩  
提樹輪囷見孤根神物枯不死抽條出雲孫虛堂奉大  
鑒曾此談風旆吾道不在默至人豈無言狂飈走龍象  
濁河倒崑崙惜哉鼻祖庭無有法懂存溶溶硯池水滴  
滴曹谿源翻經人去久此意與誰論

海幢寺

珠江濶浮天城樓影搖漾隔江人煙稀花宮屹相向碧  
瓦寒蒼蒼金容高十丈勢擬長干雄氣壓訶林壯雷峰  
大導師門下多英匠阿公經濟材鉅剎能獨徇當年用  
物宏頗傾王公藏問法來中丞布金資宿將鯨海翻炎

波旃林沒龍象俄聞議撒毀孤虛說何誑壯哉一唐生  
游門力與波旬抗樓閣僅小殘琳宮竟無恙游人甫及門  
翛然心神暢高樹垂涼陰遙山聳奇狀鐘魚答海潮蔬  
笋參蒟醬聚羶百萬蟻相將槐根葬誰能扣無生一真  
消百妄

五仙觀

萬山翼番禺一江濬其懷天開都會地形勢何雄哉古  
初隔中夏此土猶蒿萊翩翩五仙人被服光雲雷身騎  
五色羊銜穀從天來粒此炎州民饒樂無凶災羊留化  
爲石璘彬五瓊瑰以啟文明祥日夜華風開功德宜報

祀肖形在璇臺鳳簫夾雲旗髣髴靈徘徊甘霖久不降  
大地生黃埃我欲傾天河霑灑遍九垓雨工倘可借帝  
閭豈難排

大佛寺

峩峩雙門西綠樹覆紅墻佛殿如王居金身丈八強珉  
墀琅玕砌桂棟旃檀梁誰能造此寺云是平南王殘僧  
白髭鬚藩府夙趨踰爲余談舊事雪涕秋風涼王門昔  
鼎盛叱囁生電光雄兵七八萬威制天南方禪校半旄  
鉞廝養皆腰章歲儲百萬餉積金不可量冶布金銅坑  
舶走東西洋奇珍溢天府瓌寶籠遐荒猶言生男多無

以充資裝不遺錐刀利欲厚郡塢藏嫌覺起家庭  
爲參商遂釀彌天禍反甲連晉陽毒流徧生民身殘家  
破亡財寶盡沒官他人居寢堂大男死都市諸男饑道  
旁廢興三十年彈指見滄桑人生何其愚作繭如蚕忙  
萬事漚起滅富貴安可常何如歸空宗日月浩劫長王  
家滅無象茲剝獨輝煌廟祐依禪燈僅存此瓣香達哉  
老龐公傾資沈清湘觀化如夢覺逍遙無何鄉

海珠石

羅浮脉渡海露骨在波心日映千帆駛青舍衆木潏龍  
歸祠壁暗潮湧戎樓沈不淺乘槎興橫江獨釣吟

浮丘

浮山海上浮別派聳浮丘袖憶仙公把山憑佛院留金  
容四面古丹井一泓秋徑僻人稀到林猿怪獨遊

六榕寺

六榕庭院古額是子瞻書樹拔風雷夕僧殘戰鬪餘塔  
危時墮瓦碑斷欲侵鋤一刹知難整三空歎里閭

西禪寺贈翠庭禪師

菩提枯樹久無花應爲師來再吐芽白足早年工說法  
芒屨老去始還家瓦缶聲中搗毒鼓化城影裡控牛車  
龜峰便是曹谿路撥草人來徑莫差

報資寺訪曠圓禪師不遇

零落王家舊兔園  
招提新改棘爲藩  
方塘清浸如船屋  
溪樹陰藏半郭村  
坐久便同觀水月  
悟來何必辨風幡  
霜髭不見鐔津老  
孤峭門風柳標存

羊城雜詠

嶺表提封幅帶長  
番禺形勢宅中央  
萬山盡處開平土  
衆水歸時聚大洋  
物產殷饒兼陸海  
珍奇輻輳引梯航  
四時風候差調適  
秋有涼飈冬有霜

中原慘淡鬪龍蛇  
此地頻看舞井蛙  
黃屋趙佗方竊國  
花田劉隱復營家  
負嶠莫倚九泥險  
怒臂終遭齊斧加

何似歸朝何左相真芳名留得史書誇

厓山尚住宋遺民文陸當年事苦辛窮海不春猶正朔  
孤航無土自君臣忠魂鬱作潮頭怒浩氣蒸成蜃闕新  
異代流風多感激草間時有納肝人

嶺嶠初開盛武功後來文物獨稱雄端凝誰似菊坡老

崔與之鯁直今無寒鐵公周方獻霍人材元矯拔湛若

梁儲譽望舊崇隆可憐末造多卿相殉國惟聞有一忠

白沙出處自超然絕學鵝湖紹嫡傳輕詆漫勞紆史筆

實錄載公甫應一官寧足寵高賢江門浩渺思襟度孔

詩事頗多微辭廟清嚴見豆籩餘藝仍看書體妙縛茅筆勁掃秋烟

南園詩社明初盛典籍

孫

才華最出羣中葉歐

任大梁

有

推秀婉末年黎

球

鄧

雲

擅清芬地偏未染諸家病風競

堪張一旅軍韶石婁清珠海澗湘靈雅調至今聞

中州人罕到炎荒泉石應多借寵光陸賈來時山衣錦  
隱之去後水沈香宦游清白真難得遷謫羈窮也不妨  
却憶柔奴好言語此心安處是吾鄉

鯨波久假戰鋒銷閭井何緣轉寂寥商旅稀因添權稅  
編氓愁爲急征徭石門泉冷知難酌集翠裘輕肯漫燒  
北望天閭真萬里燭龍銜照莫辭遙

南州炎德實堪嘉竟歲常看不斷花露下佛桑籠火樹



風前含笑剪銀紗素馨愛產宮人塚鷹爪宜開處士家  
擬效陸璣疏草木每經花塢一停車  
十年清夢落羅浮乘興聊爲萬里遊觀海喜逢雲作市  
釣鼇思以月爲鈎飛來蝴蝶瑤臺使伐就菴葱弱水舟  
身是散仙無繫縛得淹留處便淹留

南海神廟

南海之神尊祝融百王望祀殷禮同廟門軒豁臨海岸  
吟風嘯雨朝羣龍潮頭萬里射鱗屋日輪半夜飛蛟宮  
介圭端冕王居中旁列六配稱司空涵滋萬物納萬水  
德並覆載無終窮歷代碑文儼鱗次匠手竟讓昌黎工

象鞭玉研失藏器但見銅鼓斑青紅地靈木古多異物  
綠毛倒挂駢根榕峇鬼躩踞望其國波羅斗大冰漿濃  
中華到此地已盡極望海鳥青濛濛我非使臣將玉帛  
胡爲來此驚村翁揆奇每思到窮髮要觀鵬運搏扶風  
蓬萊青丘去人近安期徐庶皆英雄六帆海舶如可借  
載我直過扶桑東

浴日亭

孤亭臨望盡重溟天水相摩不斷青日躍半洋皆紫電  
潮來大地一浮萍鵬遊世界原空濶蜃吐樓臺白杳冥  
何必褰裳慕蓬島當知此地卽殊庭

龍川縣

嶺外獨存秦縣古峰頭亂插夏雲奇趙佗霸業餘荒井  
蘇轍才名有廢祠田依疊嶂人耕苦江落層沙女汲遲  
撫字重煩賢令長獨醒偏在倒瀾時

謂允恭宗叔

南山寺

山當官閣秀寺枕縣江清天豁來帆影松長咽磬聲酌  
泉驚骨冷試屐喜身輕坐對熬峰晚層層紫翠橫

東山寺

不見南朝塔山椒古寺存斷崖欹置屋修竹暗藏門石  
勢排江轉溪聲挾雨奔浴風臨眺濶點點辨烟村

溫泉

清冷一澗水中忽湧湯泉信有金膏沸將無玉釜燃神  
功驚莫測物性喜難遷不作華清開涓涓靜可憐

霍山八首

巨靈夸父有餘閒刻意標新造霍山高插奇峰九霄上  
攢羅秀壁一屏間嵌空八面看難定峻拔千尋到莫攀  
努力來遊非好事要傳天巧與人寰  
遊戲文殊遺跡去青獅留下幻成峰橫身數里一石就  
開口半天孤刹容喬迅便應翻斗極頻呻先已絕孤踪  
撩天鼻孔無人拽一任千山落影重

山間石屋尋常有，不似靈龕數畝寬。  
僧衆盡於獅口置，齋廚都向洞天安。  
唐宗龍臥街仍在，夏后螺書蹟不刊。  
別有乾坤在巖腹，下方只作片雲看。

誰將月斧鑿天梯，太乙峰高截素霓。  
壁削不容施鐵鎖，頂平端可杖青藜。  
巖儲酒米爲天甕，穴出風雲作地臍。  
一自藍喬上昇後，鸞輪只在澗東西。

一線天中透日明，仙人逕裡浩歌行。  
森排劔笏朝炎帝，對列旌幢擁赤城。  
樹挂懸崖都不死，藥香幽澗總無名。  
石門鳥道盤迴上，萬壑風從一嘯生。

雙柱峻嶒聳碧霄，綵雲黃竹並峒堯。  
上穿斗柄天常正，

下貫鼇肩海不搖共語隔峰人似石幽尋仄徑樹爲橋  
高僧相見無言說笑汲犀池水滿瓢

鐵船峰壓萬峰巖駕孤航泛碧天橈樂動移雲海裡  
牂牁高繫日車邊旁看羣峭枝枝笋下瞰浮青朵朵蓮  
呼吸定知通帝座凌空何必羨飛仙

誌公樓閣藹重重佛迹天泉路不窮峰上起峰方峭拔  
石中抽石始玲瓏言齊衡岳應非妄論亞羅浮恐未公  
恨落蠻荒少人見誰能飛挾去江東

別華首臺塵異禪師

應是前生有夙緣萍踪邂逅便欣然同觀浴日無央海

共踏飛雲有頂天說法憑君超性相論文許我透中邊  
此心不隔毫端在莫問離程去幾千

贈鄭珠江前輩

誰能壯盛久林居谷口心情淡水如敢以南陔疎北闕  
不將綵服換金魚三更海日供晞髮四壁松明照讀書  
絕學江門如綫在石田可治待耘鋤

贈屈翁山

威鳳生來五色文覽輝不下離人羣三峰謁帝携毛女  
五岳尋仙冠切雲筆落霞標天外見詩成鸞嘯嶺頭聞  
靈均舊是風騷祖香草蛾眉併屬君

燕山晉塞早憑陵老去丘園自枕肱奉母安期蒲九節  
著書弘景閣三層琴心久歇辭謠詠龍性初馴避七矰  
終竟才人須學道才華減處道緣增

酬別陳元孝二首

珠海東邊處士星長甘漁釣老沈冥早年不用山濤語  
君有嵇紹之痛晚歲猶傳伏勝經詩工遠舶爭求集書聖新宮  
自草銘燥髮知名今始識每懷鉛槧訪雲亭

不厭欵寄歷落人天涯簽筮最情親八分先慕光榮大  
長律歸舟諷詠新林屋羅浮俱福地滄浪粟里總開身  
名山無恙藏書在雲霞何曾損竹筠



羊城行贈梁司農和吳慶百作

垂紳坐巖廊慷慨談經濟事變臨非常往往愁跋窳安  
危反掌間一髮千鈞係自非名世資淵渟而岳峙誰能  
笑談間轉圜無停勢名藩昔上書歸柄求宿衛中朝簡  
重臣連營杖節制時惟司農公經略嶺海裔縶來郊  
迎除館駕方稅洱海驟揚波驚烽燒八桂大帥公翻城  
健兒私齧臂蒼茫五羊城颯沓風雨至輔車情依倚項  
領勢牽綴鹿駭且走險馬怒將裂轡鐵甲宵有聲巖城  
畫乍閉維公坐巍然鎮靜若無事不震亦不聳沉勇而  
深智從容調軍情愷切諭天意毒弩壞機牙鈎爪挫鋒

銳潛銷反側心逆破縱橫說番禺遂帖服屹立滇閩際  
旌節徐還朝職貢來翡翠嶺表資廓清轉幹功不細由  
來使強藩銜命非易易况當危疑秋兵甲如羹沸退之  
諭庭湊杖節幾顛躓清臣使希烈履虎終見噬繫公獨  
沛如風斤盤錯試單車鎮金甌威德誠莫二羅浮峰叅  
天珠江流帶地磨崖勒鴻功永永庶弗墜

同許儀九沂惠州東江遊菊潭精舍登白鶴峰懋  
東坡亭小飲舟中作

北嶺信清佳東江復澄朗放舟赴涼颺不覺川漲廣天  
空鷗鷺明野靜菰蒲響茅菴枕江干陳跡猶可訪老僧

話劫灰山童拾栗椽照水增道心聞鐘豁塵想還謁坡  
仙祠殘碑披宿莽百代仰人龍一身困鈞黨孤亭俯層  
城江山在指掌信足慰羈窮于焉快吟賞紅荔鮮摘林  
白魚肥透網觴來不虛揮興至每獨往雜坐忘主賓浩  
歌隘天壤思從南溟魚乞作西湖長

周履坦爲余作品硯圖余酬以青花水巖硯因作  
換硯歌

周君知我有硯癖寫照遂作品硯圖圖成觀者驚神肖  
兼得情性非形模一硯在手注目視元章之顛雲林迂  
案上縱橫列數硯硯紋隱現如有無微茫點就鸚鵡眼

嫩白描出凝脂膚誰能貌人兼貌石墜君嗜硯亦成癖  
潤筆不肯畱一縑但索一枚蕉葉白君畫曾經奉至尊  
含毫盤礴銅龍門日角龍顏親貌得霜天賜出貂裘溫  
從此聲名重天下貴戚通侯爭乞畫畫價誠高石不輕  
水巖舊號天子坑紫雲上品先入貢天球弘壁同光榮  
只今零落兵斲手塗污不辨妍與醜君亦尋常貌路人  
肥皮厚肉煩烘皴余寶青花等瑤璧駿馬名姬都不易  
以君妙畫追虎頭割贈生平無所惜高情韻事兩相甘  
畱與天南作美談欲賦新詩當券帖遠慚杜老近陳髡

遂初堂詩集卷之八

海岱遊草

節母篇

京江有節母高門何潭潭伯兄爲御史季兄爲孝廉嫁  
作文學妻婉孌矜初齊如何雙黃鵠衝颺早分飛夫亡  
義當死遺腹幸有子一髮延千鈞艱辛從此始夫家無  
田廬而復喪章姑兒饑火不舉兒寒泣呱呱御史遭難  
亡門庭復憔悴獨依季兒居一室孤燈背畫紡絲軋軋  
夜課書琅琅十年不下樓廿年不臨妝兒身與戶齊人  
言能似舅弱冠登膠庠母始開笑口兒長可娶婦攜持

還家門昔年愁無兒今日欣有孫誰言一尺泉百折終  
到海誰言晦死魄經天復光彩報夫黃泉下立孤事誠  
難茹茶自知苦吞水自知寒綽楔表雙鳥行從九天下  
歌詩播清芬用告采風者

邗上贈孫豹人

關中自昔多才子近代得名康與李爾後作者絕不聞  
扶輪崛起復見君君才堂堂萬人敵鯨魚掀波鵬驟翮  
不將客氣驚凡愚淳古清真露肝鬲本家渭北秦山蒼  
半生皂帽依維揚秦聲剛烈吳聲緩君能兼美無偏傷  
廣塲詞客如蟾沸君詩一出千人廢旗亭蕭寺墨淋漓

見君一篇瓊樹枝  
雞林爭購樂天集  
并布解織都官詩  
往年天子開延英  
鶴書催赴彤墀行  
鷄鷄不樂響鐘鼓  
一官強授鴻毛輕  
掉頭歸來海天濶  
百尺修竿釣寒月  
意氣猶然大布衣  
翻憎過客呼官閤  
我亦逍遙露地牛  
無端忽著金籠頭  
羊腸詰曲不可上  
蛾眉譎詠令人愁  
歸來平澗之曲山  
之幽秋菘春笋有  
真味豈必太官分  
珍羞少陵一草亭  
貞白三層樓共君  
眠雲復弄月不與  
菌蟪爭春秋

贈喬石林

疎狂我合辭金闕  
練達君胡返故園  
天馬能鳴驚立仗

芳蘭無罪坐當門便違藜火青箱在任卸銀魚皂帽存  
從古文人多挫抑翻雲覆雨不須論

日日聯鑣尚恨疎那堪五歲悵離居漫誇向子工游嶽  
終遜虞卿善著書讀易幾人知損益看某此日悟乘除  
興來千里能相訪銜袖新篇有遂初

題可帆亭

虛亭迥在水中央深柳新荷面面涼宛似一篙經碧浪  
何殊雙槩泛青湘魚游天上餐雲影樹倒波心濯練光  
莫怪幽人耽結隱暫來與世便相忘

園居詩十首



誰信高城裏滄波百畝寬  
長春花藥潤不夏水風寒  
隨地皆三徑何人割一官  
羊腸飽經歷轉覺入林安  
屋宇無多置軒牕面面開  
松疎無日漏竹密有雲來  
亭擬虛舟敞橋依曲澗迴  
披襟愛空澗一芥盡浮杯  
東山休捉鼻南垞漫焚魚  
且輟凌雲手來繙種樹書  
全堤乞楊柳盡水予芙蓉  
百卉分畦布樊遲學不疎  
籃輿無著處一艇往來便  
透入瀟湘盡移來苕霅天  
蘸波千樹濕倒影百花然  
欲得浮家樂蓬窓自在眠  
此中無俗客容我住兼旬  
割贈林泉趣平分懶散人  
偶來時正美乍見物皆親  
天地蘊廬耳名誰是主賓

此地宜逃暑炎蒸六月無水涼侵枕簟林翠滴肌膚尊  
至羈愁失風來病骨蘇倏然人世隔永日在水壺

性拙緣都減神閒夢亦清至文波澹沱天籟鳥嚶鳴侵  
曉扶松立衝霄領鶴行機心渾息盡惟有一枰爭

芰荷千萬本併作一池花照水承初日烘天鬪晚霞餐  
香憐靜婉吸露賞清華湧現青蓮界金繩路不賒

存訪皆同好淹畱爲故交經旬廢冠襪排日治觴肴曲  
愛新聲奏書矜秘本鈔卜鄰吾有意梁燕已成巢

熊魚不兼取鵬鷁兩相憐借問雙藤杖何如一畫船端  
居看唇市鼓腹戴堯天不受塵勞縛身輕卽是仙

題喬石林侍直圖

天門峩峩開紫清，千官環珮趨無聲。聖人宵衣坐便殿，  
平章政事惟孤卿。史臣亦得聞密勿，記言書事職不輕。  
幾人當直曾論事，驩駟立仗不得鳴。白田先生仁且勇，  
致君堯舜懷丹誠。不忍災黎填巨壑，敢以赤手批長鯨。  
因承清問畫笏對，非非是是無將迎。金高如山不肯顧，  
更申讜論排盈廷。朝陽鳴鳳近希有，都人嘆息巖廊驚。  
迴天轉日在俄頃，不然海邦今沸羹。鑠金銷骨古一轍，  
白璧竟點蠅營營。孤臣去國何所憾，一日之紕于秋榮。  
往時我亦司記注，朝朝簪筆彤墀行。從無一言補袞闕，

徒遭譴謫，漸無名。江臯臥病，聞壯節飄蕭，髮欲衝冠，纓誰歟。工畫寫此本風儀，挺特標金莖。宋廷侃侃立，鄭俠唐陛嶽嶽來。陽城男兒不朽，要自致百年富貴。風中萍，吁嗟乎百年富貴風中萍。

戚烈婦詩

白田戚氏婦亡，其姓嫁之夕，未合，盥夫溺死池中。婦悲慟，畱詩褥下，亦自沉死。洪武間事也。崇禎時，文文肅過白田，夢一女子自言我戚烈婦也。有碑埋故里，幸爲我發之。文肅諭諸喬侍御，侍御爲出碑，建祠祠在城東北隅，卽戚氏故居也。

戚家婦命何苦三星在戶未成婚夫死清池奈何許百  
年之好無一夕牽牛織女空相匹此身有屬將安歸一  
死從夫萬事畢遺詩決絕何酸辛英風凜凜垂千春發  
夢名臣憑正氣殘碑出土崇祠新人言烈婦可不死能  
死之人世有幾忠臣節婦根於心捐軀豈論恩淺深君  
不見西臺哭金川哭下土何曾食君祿

爲劉禹美題接翠園圖

雲綿綿樹芊芊何人鑿破鴻濛天萬个琅玕掃空翠千  
株楊柳搖輕煙清池一頃罩以蓮花何灼灼葉田田風  
亭卓立鷗岸迥畫橋折入漁梁偏科頭蕭灑松下客拍

浮容與船中仙人間何處得此景無乃鑑湖與輞川白  
田黃門愛蕭爽故營別墅清溪邊某水某丘本吾土一  
花一樹皆天然鷗鳥忘機風浪靜此中偃仰堪窮年只  
恐鋒車催就道未容清簟高春眠作圖搗之到紫陌欲  
令隨地開林泉公餘退食時展玩清風兩腋生翩翩人  
生亦要存微尚可舒可卷方爲賢何用輪衝與轂擊何  
須膠縛兼藤纏君爲熱官有冷趣定知風節能完堅滄  
浪亭中人未老異日猶能和子池上篇

贈淮陰張力田

六藝一曰書於學不爲小洪纖括名物深淺該理道三

蒼廢至今文人騁詞藻問以六書義吐口莫能曉至夫  
書家流體勢驚工巧識字苦不多落筆愁顛倒張君產  
淮陰樸學天下少枕藉許氏書精微析毫杪淵源湖蟲  
篆波瀾涉隸藁金石及牋麻有蹟靡不討斟古酌時宜  
自立一家表流俗不駭驚先民可繼紹在漢立石經千  
秋作鴻寶當時崔蔡倫執筆非草草世遠經術焚此道  
棄如掃安得登鴻生三體共研考勒石置橋門垂象日  
星皎君今齒雖尊精力未衰槁翹車尚可招無爲掩關  
老

贈胡周恪

倦客聊停下澤車  
幽人方著等身書  
凌雲藻思知名久  
霏屑清談識面初  
老不干人詩骨勁  
貧維學稼俗塵疎  
青箱付與佳兒了  
滌硯澆花樂有餘

贈陳東來

東來條議開肝貽天長古渠總濟王公採以人奏并上其家藏蠟衣生集

條議曾看入奏章  
藏書也復達天闈  
人生一節堪千古  
五月披裘樂未央

題張燕三像

楚天放鶴高人事  
燕市懸壺濟世心  
儻遇小龍求瘵疾  
神方還與乞千金

追懷邢太僕子愿



有明書家十數子北方傑出邢與米米書粗豪駭庸俗  
太僕軒軒特流美秀不傷骨道有鋒玉山灼夜鵬摩空  
得筆得韻信游絕竝驅南董人地同當日聲名高北斗  
兼金一字高懸購今求真蹟尺幅無來禽之館傾頽久  
徒緡遺集重咨嗟淹雅名通自一家擬議微嫌墜時轍  
縱橫不礙舒天葩後生莫漫輕前輩往往一身兼數器  
右軍經濟掩書名松雪文章韜藝事刀環水淺不成河  
鹿角關前戍壘多文采風流都已矣寒山片石重摩挲

贈邢搢石索其家刻

太僕書堂蔓草屯白頭猶喜見諸孫青箱不逐田園廢

遂初堂集

海岱遊草

七

墨妙還同栝菴存賀監摹書龍透爪丹丘藏本雪畱痕  
重緡片石欣無恙尚想中郎對虎賁

贈東藩衛爾錫前輩四首

乍聽真儒報賜環野夫雀躍遶田間樸忠竟可邀宸眷  
讜論何妨觸九關古鏡重磨光照地蟄龍初奮雨連山  
羣陰剝後孤陽復一綫天心自往還

莫驚方岳用詞臣袞職賢勞出入均行省異時稱副相  
青齊自古號東秦澄清志以高官遂冰雪操從歷試真  
膚寸出雲天下雨萬山一岱最嶙峋

論交折節感當年倒屣相迎一榻懸翻紐四聲同扣擊

丹黃萬卷共精研  
暫辭永隔鴻蓮燕  
偶聚旋分箭別弦  
知己人生難再得  
夢魂常是繞汾川  
已分寒蟬抱樹枯  
從今不復悵窮途  
修齡索食依仁祖  
子美題詩主達夫  
日觀泉林諧夙願  
芒鞋竹杖健殘軀  
只愁便擢台司去  
得盡綈袍繾綣無

贈臨淄令朱信昭

臨淄地是古齊都  
女水牛山儼畫圖  
疋馬我來閑訪古  
雙旌君恰此分符  
梧臺雲物先秋美  
稷下風謠似昔無  
吏治端須本經術  
史書循卓總通儒

呈益都相公二首

太平宰相就閑身玉曆平開八十春  
機務謝來添黑髮  
林泉占處絕紅塵  
量涵天海羣流納  
興狎禽魚萬象親  
青史幾多名宰  
執樂全難得似公人

平津門下士如林  
謫劣偏蒙寵  
遇深捧杖每陪蕭寺坐  
擘箋常和柳堂吟  
青霄綴羽恩難報  
黃石畱書約可尋  
樞謁門牆還不忝  
松筠相守歲寒心

贈青州守金立三

淄青千里控單車  
太守尊嚴岳牧如  
形勢東秦雄海岱  
風謠變魯盛詩書  
盡輪行處恩膏沛  
驟篠過時疾苦除  
天畔相逢話鄉曲  
不教客夢憶尊魚

贈益都令唐信賀

股肱名郡數青州首邑提封控上游  
駝鳳山高當閉見  
淄澠水駛抱城流  
詩書萬戶民多秀  
禾黍千村歲有秋  
撫字重煩賢令長  
瀕風竹馬起新謳

佳山堂四首

結想茲堂勝  
今來愜曠觀  
林光浮壁潤  
嵐翠滴衣寒  
吐瀑池清泚  
蒸雲捲曲盤  
過淮修竹少  
憂玉此干竿  
奇石驚天落  
瓊瓏卓數峰  
垂垂舞袖安  
裊裊篆文重  
斲就夸娥手  
飛來瓊島蹤  
百回看不厭  
盡日倚蒼松  
層樓舒遠嘯  
踴躍衆青來  
雙嶺削雲門  
一鏡開秋

心霞外斷海色鴈邊回懷古無窮意宮牆十丈苔

吾師休暇日一榻坐忘年把臂南泉老披襟綺里仙追

攀容下士觴詠及涼天最羨王文度龐眉在膝邊

長公真臣

年六  
十矣

### 遊東海神廟作

去年南游到南海曾謁神廟看韓碑今年東游到萊郡

東海神廟復在茲叅藩使君玉堂舊邀我飛鞚乘涼颺

連朝陰雨忽晴霽徑渡掖水凌崗陂遙瞻廟貌森枯栢

近陟神堂肅雲旗累朝巖祀碑炳煥兩廡踴像龍躩踞

致齋丞尉亦專室訪古里嫗存偏祠

廟側有孫母祠  
曾識宋太祖于側

微今里人皆其後裔望海高樓出雲表下臨溟渤無津涯晴潮無

風平若鏡一碧萬里鋪琉璃帆檣凌空亂鳧乙鳥嶼帖  
水橫鯨鯢人言蓬萊方壺只在渤海內去人不遠風聞  
之所以秦皇漢武數巡幸褰裳欲渡勞夢思鞭石不成  
橋採藥還無時何如長夜一夢寤出生入死同遊嬉清  
都靈境難久住歸鞭暮色來崦嵫篝燈哦詩寄鈴閣此  
樂千載疇能追

白雪樓二首

獨上層樓旅抱開秋空澄爽絕纖埃當牕嵐翠蛾眉掃  
隔院泉聲風雨來瞻代詞人仍俎豆滿庭碑碣總莓苔

雕梁畫棟知何限不共茲樓過劫灰

百尺高眠四海空滄溟文玷夙稱雄生憑婁水墳篋應  
死耐虞山玉石攻盛世才華容傲睨達人官爵謝牢籠  
清嚴標格依稀在華鵲蒼寒落木中

闕里

讀聖人書爲弟子可能不到聖人門行經洙泗知源遠  
望見龜蒙想道尊魯殿猶存傳雅奏檜枝不老秀雲孫  
世家有例誰能續願得懷槩細討論

岱歸過江上同董閔石徐虹亭集曹我齋齋

倦遊乍喜駐征鞍訪舊還欣話夜闌此日深林投足穩



古來直道事人難，劇場變眩看無定。碁局雌雄角未殘，  
江上數峰長自碧。尋盟歲歲莫教寒。

君山

君山硯礪一拳石，臨眺居然萬里寬。煙樹隔江浮寸碧，  
雲霞大海浴雙丸。地經戰鬪殤魂苦，山葬英雄俠骨寒。  
逸興偏能賞幽冷，一天風雪倚闌干。

寓齋大雪和閬石韻

歲晚城笳咽宵寒，野鶴呼起看千嶂。白轉覺一身孤薄，  
醉松邊枕微吟竹下爐。論心老友在，未敢嘆窮途。

雪中游山歸閬石見貽一絕走筆答之

木落江寒客到稀，愛看殘雪坐忘歸。  
六鰲只在東溟裏，欲把君山作釣磯。

董閔石黃庭表錢宮聲小飲寓齋次韻

天畔懷人每惘然，可能相見不翫連。  
霜餘葵藿晚多味，雪後江山清可憐。  
蝶夢闌殘嗟往事，瓠尊牢落感頽年。  
五湖煙水無爭競，長擬追尋釣艇邊。

寓漫園贈裘翁

江陰俯大江，城居可吟詠。  
曹家園頗荒，水木乃清妙。  
古檣龍連蜷，白松雪照耀。  
池寬蹙風漪，石瘦攢雲竅。  
屋宇樸而文，煙光領其要。  
樓高見海帆，堂迥明山燒。  
主人滯

金門頗遭猿鶴誚念此早歸來就閒理耕釣眼明見故人懸榻欣相名分巖恣雲眠贈竹發天笑宦味刀舐蜜人情寒附燎奔車亦羊腸一跌未可料祭酒官不卑五旬齒非少及此娛林泉何殊夢初覺采采南陔蘭德養以爲孝廣受真可師光禹豈足效